

DECLARATION

DV ROY, PAR LAQVELLE
 sa Majesté a fait & estably la R E Y N E
 son Espouse, Gouvernante de sa bon-
 ne Ville de Paris. Avec commande-
 ment à tous Gouverneurs, Capitaines,
 Officiers, Iusticiers & autres de luy
 obeïr, Et à la Chambre des Comptes
 d'alloyer aux comptables, ce qui aura
 esté payé en vertu de ses Ordonnan-
 ces.

Verifiée en Parlement le 6. Septembre 1636.



A P A R I S,

Par A. ESTIENE, P. METTAYER, C. PREVOST
 & P. ROCOLET, Impr. ordinaires du Roy.

Ruë Saint Jacques, devant Saint Benoist, au College Royal.

M. DC. XXXVI.

Avec Privilege de sa Majesté.

41

Case

F

39

326

1636 fed

THE NEWBERRY
LIBRARY



LOVIS par la grace de
Dieu Roy de France &
de Nauarre, A tous ceux
qui ces presentes lettres
verront, Salut. COMME nous auons
resolu, pour ne defaillir à nos sujets
ny à nostre dignité, de nous achemi-
ner vers nostre Prouince de Picar-
die, avec de puisésâtes forces pour re-
pousser nos ennemis, lesquels s'y sont
auancez par la lascheté des Gouver-
neurs d'aucunes de nos places fron-
tieres, qu'ils ont prises sans y trou-
uer aucune resistance: Nous auons
iugé à propos, de laisser quelque
personne de grande authorité, pour

A ij

commander en nostre bonne Ville de Paris, capitale de nostre Royaume, & qui ayt toutes les qualitez requises pour remplir dignement ceste charge, & contenir nos peuples en la fidelité qu'ils nous doiuent. Et apres y auoir meurement pensé: N'ayans point trouué de sujet plus digne pour cela, que la Reyne nostre tres chere & tres-amee Espouse & Compagne, tant pource que les intersts de la grandeur de ceste Monarchie luy sont communs avec nous, que pour le souuenir que nous auons, avec combien de prudence & de sagesse elle a ménagé l'autorité que nous luy auons cy-deuant donnée en diuerses rencontres de nostre éloignement; Nous auons tout sujet, de nous en promettre vn heureux succez: ayans bien remar-

qué en cela , que Dieu donne des
 lumieres & des graces aux person-
 nes, conformes à la grandeur de leur
 naissance & condition. P O U R C E S
 C A U S E S & autres bonnes & gran-
 des considerations à ce nous mou-
 uans, Nous auons fait, ordonné &
 estably, faisons, ordonnons & esta-
 blissons par ces presentes signées de
 nostre main, ladite Dame Reyne,
 nostre tres chere & tres amée Es-
 pouse & Compagne, Gouuernante
 de nostredite bonne Ville de Paris,
 & luy donnons plain & entier pou-
 uoir en nostre absence, & pendant
 nostredit voyage, de pourueoir à
 tout ce qui sera du bien de nos af-
 faires & seruice en ladite Ville & es
 enuiron d'icelle: Commander à
 tous Gouverneurs de places, Capi-
 taines, Officiers & Gens de guerre

tant de cheual que de pied qui y se-
 ront establis en garnison & és Vil-
 les & places voisines: les en tirer &
 changer pour les enuoyer de lieu à
 autre, ou leur faire tenir la campa-
 gne si besoin est, selon que la ne-
 cessité le requerra & qu'elle adui-
 sera pour la seureté desdites Villes
 & places: mesme d'en faire leuer si
 besoin est, & que l'occasion re-
 quiere celerité, en attendant qu'elle
 nous en ayt donné aduis. Faire &
 arrester les marchez des viures &
 munitions necessaires pour leur
 subsistance. Tenir la main au paye-
 ment & recouurement de nos de-
 niers, & d'iceux disposer selon les
 occurrences. Ordonner des repa-
 rations & fortifications des places, ar-
 mes, poudres, artillerie & viures.
 Donner les departemens & loge-

mens desdits Gens de guerre passans & sejourrans en l'estenduë desdits lieux, mesme de leurs viures soit par estape ou autrement, le plus au soulagement de nos subjets que faire ce pourra, & conformément à nos Ordonnances & Reglemens. Assembler le Conseil de ceux que nous auons laissez pres d'elle, & ordonner en iceluy & faire executer, tout ce qu'elle aduifera pour nostre seruice, és occasions qui s'offriront tant pour la conseruation en nostre obeyssance de nostredite Ville de Paris & lieux circonuoisins, que de nos subjets desdits lieux, & iceux faire viure en bonne vnion & intelligence: Et generalement faire ordonner & executer pour le bien de nostredit seruice en nostre absence, tout ce

que nous ferions & faire pourrions
 si nous y estions presens en per-
 sonne , combien que le cas re-
 quist mandement plus special :
 Promettant en foy & paroie de
 Roy , confirmer & approuuer tout
 ce que par nostredite Espouse &
 Compagne , aura esté fait & ar-
 resté en cela.

SI DONNONS EN MAN-
 DEMENT à nos amez & feaux
 Conseillers , les Gens tenans no-
 stre Cour de Parlement , Que ces
 présentes ils ayent à faire enregi-
 strer , & du contenu en icelles ,
 faire souffrir & laisser iouir plai-
 nement & paisiblement nostredi-
 te Espouse & Compagne. MAN-
 DONNS à tous Gouverneurs , Ca-
 pitaines , Chefs & Conducteurs
 de nosdits Gens de guerre de l'e-
 tenduë

Attenduë desdits lieux , & tous autres nos Officiers , Iusticiers & subjets qu'il appartiendra , qu'à nostredite Espouse & Compagne, ils ayent à obeïr , & entendre diligemment és choses touchans & concernans le present pouuoir.

M A N D O N S en outre, à nos amez & feaux Conseillers les Gens de nos Comptes à Paris, Que tout ce, que par les Tresoriers de nostre Espargne , de l'Ordinaire & Extraordinaire de nos guerres & autres comptables, aura esté payé par les Ordonnances de nostredite Espouse & Compagne , ils ayent à passer & alloüer en la despense de leurs comptes , déduire & rabatre de la recepre d'iceux , leur mandans ainsi le faire sans difficulté; C A R tel est nostre plaisir. E N

témoin de quoy nous auons fait
mettre nostre seel à ces presentes.
DONNE' à Paris le premier iour
de Septembre, l'an de grace mil six
cens trente-six, & de nostre regne le
vingt-septième.

Signé,

LOVIS,

Et sur le reply, Par le Roy,

DE LOMENIE.

Et scellée sur double queue du
grand Seau de cire iaune. Et encor
sur ledit reply est écrit:

*Registrées, Ouy le Procureur
General du Roy, pour estre exe-*

cutées selon leur forme & teneur.
A Paris en Parlement le sixié-
me iour de Septembre mil six cens
trente-six.

Signé, [] DV TILLET.









